

आकाशवाणी जयपुर-अजमेर
प्रादेशिक समाचार

दिनांक 16.07.2025

समय: 18.45 बजे

- केन्द्रीय मंत्रिमण्डल 100 जिलां मांय चलायी जावण वाळी **प्रधानमंत्री धन-धान्य कृषि योजना** ने मंजूरी दीनी।
- केन्द्रीय सहकारिता मंत्री अमित शाह रो काल जयपुर आवण रो कार्यक्रम- दादिया गांव मांय सहकार अर रोजगार उत्सव रो उद्घाटन करेला।
- सामाजिक न्याय अर अधिकारिता मंत्री रामदास अठावले कह्यो-एनडीए सरकार समानता सागे देश रा हर रहवासी ने न्याय देवण री कोशिश कर रही है।
- प्रदेश मांय मतदाता सूचियां अपडेट करण सारू **विशेष गहन पुनरीक्षण अभियान** चलायो जावेला।

000

केन्द्र सरकार प्रधानमंत्री धन धान्य कृषि योजना चलावण रो फैसलो कीनो है। केन्द्रीय मंत्री अश्विनी वैष्णव आज खबरनवीसां ने आ जाणकारी दीनी। वे प्रधानमंत्री नरेन्द्र मोदी री सदरत मांय आज व्ही केन्द्रीय मंत्रिमण्डल री मीटिंग मांय करी ज्या फैसलां री जाणकारी दे रह्या हा। श्री वैष्णव बतायो के एनटीपीसी लिमिटेड री नवीकरणीय ऊर्जा रा हलका मांय 20 हजार करोड़ रुपया रा निवेश री योजना ने ई मंजूरी दे दीरीजी है। मंत्री बतायो के मंत्रिमण्डल री मीटिंग मांय एनएनसी इण्डिया लिमिटेड ने 7 हजार करोड़ रुपया री मदद देवण रो फैसलो ई करी ज्यो। श्री वैष्णव बतायो के 100 जिलां मांय मौजूदा माली साल ऊं छः साल सारू चलायी जावण वाळी **पीएम धन धान्य योजना** माथे 24 हजार करोड़ रुपया खर्च कर्या जावेला। इण मांय 11 मंत्रालयां ऊं जुड़ी 36 योजनावां शामिल करी जावेला।

श्री वैष्णव बतायो के भारत स्वच्छ ऊर्जा हलका मांय तेजी ऊं काम कर रह्यो है। वे बतायो के देश स्वच्छ ऊर्जा क्षमता रो आधो काम पांच साल पैली ई पूरो कर लीनो है। केन्द्रीय मंत्रिमण्डल अन्तर्राष्ट्रीय अंतरिक्ष स्टेशन ऊं ग्रुप कैप्टन शुभांशु शुक्ला रे पाछा आवण ऊं जुड़यो प्रस्ताव पास कीनो। प्रस्ताव मांय कही ज्यो के शुभांशु रो आईएसएस माथे 18 दिन रो ऐतिहासिक मिशन पूरो करणो भारत रा अंतरिक्ष कार्यक्रम सारू नुवो अध्याय है।

000

संसद रो पावस सत्र 21 जुलाई ऊं सरू व्हेला। 21 अगस्त ताई चालण वाळा ई सत्र रे दौरान केन्द्र सरकार री ओर ऊं जी.एस.टी. संशोधन बिल 2025 अर कराधान कानून संशोधन बिल समेत कई खास बिल पेश कर्या जावण रा आसार है। लोकसभा सचिवालय रे मुजब केन्द्र सरकार जन विश्वास संशोधन विधेयक, भारतीय प्रबन्ध संस्थान संशोधन विधेयक, भू-धरोहर स्थल अर भू-अवशेष संरक्षण अर रख-रखाव बिल अर राष्ट्रीय खेल प्रशासन विधेयक समेत आठ विधेयक सदन मांय पेश करण री योजना बणा रही है। संसद रो सत्र सरू व्हेवण ऊं पैली 20 जुलाई ने सगळी सियासी पार्टियां री मीटिंग बुलाई जावेला।

000

केन्द्रीय गृह अर सहकारिता मंत्री अमित शाह रो काल जयपुर रो दौरा करण रो कार्यक्रम है। वे दादिया गांव मांय सहकार अर रोजगार उत्सव रो उद्घाटन करेला। ई मौके श्री शाह सरकारी महकमां मांय नुवी नौकरी लाग्या 8 हजार नौजवानां ने नौकरी लागण रा कागजात ई सूपेला। वे पुलिस री 100 नुवी गाड़ियां ने ई हरी झंडी बता र रवाना करेला। वां रो 64 मिलेट आउटलेट्स रो उद्घाटण करण रो ई कार्यक्रम है। श्री शाह दुग्ध उत्पादक सहकारी समितियां ने 23 सौ ऊं बत्ता माईक्रो ए.टी.एम. ई सूपेला। ई बीचे सहकारिता मंत्री गौतम कुमार दक आज भाजपा रा प्रदेश अध्यक्ष मदन राठौड़ अर जयपुर री सांसद मंजू शर्मा सागे दादिया जा र

सहकार अर रोजगार उत्सव री तैयारियां रो जायजो लीनो। मुख्यमंत्री भजन लाल शर्मा रो ई ई कार्यक्रम मांय सिरकत करण रो कार्यक्रम है। ध्यानजोग है के संयुक्त राष्ट्र महासभा साल 2025 ने अन्तर्राष्ट्रीय सहकारिता वर्ष रा तौर ऊं मणावण रो ऐलाण कीनो है। ई रा तैत देश मांय ई केन्द्र सरकार राज्यां ने सहकारिता ऊं जुड़्या 54 काम संप्या है। प्रदेश मांय ई सहकार सम्मेलन राख्यो जा रह्यो है। राज्य सरकार सहकार ऊं समृद्धि री भावना सागे समाज रा कमजोर तबका री जनता ने मजबूत बणावण सारु काम कर रही है अर आज प्रदेश रो हर छठो रहवासी सहकारिता ऊं जुड़ ग्यो है। राज्य मांय 313 नुवी ग्राम सेवा सहकारी समितियां बणायी ज्यी है अर 412 कस्टम हायरिंग सेन्टर्स बणायी ज्यो है। सहकारी समितियां मांय 212 नुवो गौदाम ई बणाया जा रह्या है। ई सागे ई किसानां अर ढांढा-ढोर राखण वाळां ने डेयरी ऊं जुड़्या काम-काज सारु एक लाख रुप्या ताई रो बिना ब्याज रो कम मियाद रो कर्ज मुहैया करायो जा रह्यो है।

000

केन्द्रीय सामाजिक न्याय अर अधिकारिता राज्य मंत्री रामदास अठावले कह्यो है के केन्द्र री मौजूदा एनडीए सरकार एकता अर समानता सागे देश रा हर एक जणा ने न्याय देवण री कोशिश कर रही है। वे आज जयपुर मांय खबरनवीसां सागे बातचीत कर रह्या हा। केन्द्रीय मंत्री कह्यो के सरकार वंचित अर कमजोर तबका रा बच्चां री भणार्-लिखाई माथे खास ध्यान दे रही है। वे मुम्बई मांय भाषा रा नाम परां चाल रह्या झगड़ा री खिलाफत करता थकां कह्यो के भाषा रा नाम माथे सियासत नी व्हेवणी चाहिजे। श्री अठावले कह्यो के संविधान लोकतंत्र री सब ऊं मोटी ताकत है। वे कांग्रेस माथे संविधान रा नाम ऊं झूठी राजनीति करण रो आरोप माण्ड्यो। केन्द्रीय मंत्री कह्यो के कांग्रेस संविधान बता र समाज मांय फूट डालबा री कोशिश कर रही है।

000

प्रदेश मांय वोटर लिस्टां मांय जरूरी बदलाव सारु खास अभियान चलायो जावेला। ई रा तैत बी.एल.ओ. घर-घर जा र मतदाता सूचियां मांय बदलाव रो काम करेला। मुख्य चुनाव अधिकारी नवीन महाजन आज जयपुर मांय राख्यी ज्यो राज्य स्तर रा विशेष गहन पुनरीक्षण प्रशिक्षण कार्यक्रम मांय आ जाणकारी दीनी। वे बतायो के ई सारु प्रदेश रा 41 जिलां रा 43 मास्टर्स ट्रेनर्स ने सिखावण दी जा रही है जो जिलां मांय जा र बी.एल.ओ. अर सुपरवाइजरां ने सिखावण देवेला। श्री महाजन बतायो बीएलओ राज्य मांय वोट देवण रा पात्र करीब पौने छः करोड़ लोगां रा घर जा र वां ऊं फॉर्म भरवा र मतदाता सूचियां मांय बदलाव रो काम करेला।

000

मौसम विभाग जयपुर अर बीकानेर संभाग रा कुछ हलकां मांय आज भारी बारिश रा आसार जताया है, जद के कोटा संभाग मांय काल कठे-कठे तेज बारिश री संभावना है। प्रदेश रा ऊगणी अर आतूणी हलकां मांय बरसात रो जोर कम व्हेवण रा आसार है। ई बीचे लारला चौबीस घंटां मांय प्रदेश मांय सब ऊं बत्तो 8 सेंटीमीटर पाणी श्रीगंगानगर रा श्रीविजय नगर मांय बरस्यो। बांसवाडा, डूंगरपुर, अलवर, चित्तौडगढ़, कोटा, भरतपुर, अजमेर, बाड़मेर, जालौर, बीकानेर अर हनुमानगढ़ मांय ई बादळां री गाज सागे हल्की ऊं मझला दर्जा री बिरखा व्ही।

ई बीचे लोकसभा अध्यक्ष ओम बिरला कोटा मांय व्ही जोरदार बिरखा रा असर वाळा हलकां रो आज दौरों कीनो अर मेह रे कारण व्हा हादसां रा शिकार लोगां रा पिरवारवाळां सागे मुलाकात कीनी।

दूजी कानी करौली-धौलपुर रा सांसद भजन लाल जाटव करौली मांय अहलकारां सागे मीटिंग कर र पाणी भरण री ठौड़ां पिछाण कर र किण री भात री आपदा रो सामो करण सारु योजना बणावण रा हुकम दीना।

000

चौमासा मांय साफ-सफाई राखण अर मौसमी बीमारियां ऊं जुड़ी चुनौतियां रो सामो करण सारु कोटपुतली-बहरोड़ मांय न्यारा-न्यारा जागरूकता कार्यक्रम राख्या जा रह्या है। **सफाई अपनाओ-बीमारी भगाओ** अभियान रा तैत आज पावटा हलका मांय तळावां रे आरे-सारे साफ-सफाई करी ज्यी।

000

केंद्रीय माध्यमिक शिक्षा बोर्ड—सीबीएसई स्कूलां मांय तेल बोर्ड बणावण रा हुकम दीना है। विद्यार्थियां मांय स्वस्थ जीवनशैली अपनावण ने बधावो देवण सारु आ पहल करी ज्यी है। सी बी एस ई ई बाबत् स्कूलां ने खत लिख्यो है। कागद मांय स्कूलां मांय स्वस्थ भोजन अर शारीरिक हलचल ने बधावो देवण बाबत् माण्डी ज्यो है। बोर्ड विद्यार्थियां सारु सीढ़ियां काम लेवण ने बधावो देवण अर कसरत सारु छोटी छुट्टी देवण सारु ई कह्यो है। एक रपट रे मुजब साल 2021 मांय भारत मांय बत्ता वजन अर मोटापा रा शिकार लोगां री तादाद 18 करोड़ ही जिण रे साल 2050 ताई 45 करोड़ व्हेवण रो अन्दाजो है।

000

देश मांय वित्तीय समावेशन संतृप्ति अभियान रा तैत कामकाज रा पहला दो सप्ताह मांय एक लाख 40 हजार जन धन खाता खोली ज्यो है। वित्त मंत्रालय ई महीना री पहली तारीख ऊं तीन महीना रो ओ अभियान सगळी ग्राम पंचायतां अर शहरी स्थानीय निकायां मांय सरु कीनो हो। इण मांय प्रधानमंत्री जन धन योजना, प्रधानमंत्री जीवन ज्योति बीमा योजना, प्रधानमंत्री सुरक्षा बीमा योजना अर अटल पेंशन योजना शामिल है। मंत्रालय रे मुजब आं योजनावां ऊं जुडी जाणकारियां देवण सारु न्यारा—न्यारा ज़िलां मांय 43 हजार ऊं बत्ता शिविर लगायी ज्यो है। 30 सितंबर ताई चालण वाळा ई अभियान मांय जनता री माली मजबूती तैय करण सारु करीब दो लाख 70 हजार ग्राम पंचायतां अर शहरी स्थानीय निकाया ने भेळा करी ज्यो है।

000